



FOTO RALPH FEINER / 52BESTEBAUTEN

Chasa da l'emprima architecta ETH en Grischun

■ (ls/dat) In'atgna chasa ora en il verd, quai era per blers en ils onns da conjunctura in siemi. E cun la bainstanza han adina daplì persunas pudì sa prestar quel siemi. Surtut en ils onns 60 hai dà in veritabel boom. In exempel per quel svilup è la Chasa Brügger ch'è vegnida construida dal 1959/60 en in bun lieu sin la spunda sulegliua en il nordost da la citad veglia da Cuira. La cha-

sa ha *Monica Brügger* (*1932) realisà per ses geniturs. Brügger è stada l'emprima architecta ETH en il Grischun, e cun la chasa «paterna» ha ella realisà ses «Gesellenstück» nua ch'ella sa mussa sco represchentanta dad in'architectura modernistica.

En egl dattan il tetg da pult senza pensa ed ina fatschada vers sid cun in'assimetria stricta. La part dretga è prendida enavos

in zic per dar spazi ad in balcon ed ina piazza da seser. Las paraids da lain stattan en confront cun la fatschada alva da la vart sut.

La vart sanestra, cun grondas fanestras, dat vista libra sin las muntognas – la quala vegn be interrutta dad in chamin dominant, aut e rustical che regorda ad in'architectura moderna da l'America da quel temp.